

AKASHVANI AIZAWL
REGIONAL NEWS BULLETIN

HEADLINES (EVENING)

- 1. Dampa bial by election atan karleh thawhlejni a vote thlak turin inpuahchahna chuan a vawr tawp thleng chho tawh .
- 2. Naktuk Pathianni tlai dar 4-ah Dampa bial by election atana campaign hun a tawp tawh dawn avangin, vawiin khan political party te chuan vote zawn hun hnuhnung an hmang .
- 3. Central YMA President Pu R. Lalngheta chuan Mizoram chak lakna kawngpui a that theih loh chuan hnathawk tur midang lo lut rawh se tih hun a thleng lovang tih a sawi theih loh a ti.
- 4. Prime Minister Narendra Modia chuan vawiin khan Varanasi atangin Vande Bharat Express train thar pali a vailiam.

<><><>

DAMPA PREPAREDNESS

Dampa bial by election atan karleh thawhlejni a vote thlak turin inpuahchahna chuan a vawr tawp thleng chho tawh a,

Vawiin khan polling party te tan training hnuhnung ber neih a nih bakah an vawiin tlai khan an bungraw ken turte endik felna neih nghal niin naktuk hian polling station hla zual 6 a duty tur te chuan an duty na tur hmun panin an kal dawn a ni.

Dampa bial by election Returning Officer Pu Malsawmzuala chuan inthlan hma chhawn turin an inpuahchah nasat tawh thu leh tluang tak a inthlan an neih theih a beisei thusawiin naktuk hian polling station hla zual 6 - Silsuri 1, 2, 3, Zopui, Hnahva leh Lianbuang a duty turte chu an kal chhuak tawh dawn a, a bak zawng a duty turte chuan naktip thawhtanni khian an duty na tur hmun an pan ve thung dawn a ni.

BYTE

Puan tawh thin angin Dampa bial by election lo awm turah hian National party 2 BJC leh INC, State party 2 MNF leh ZPM bakah Unrecognised register party MPC ten an inchuh dawn a, Dampa bial ah hian Polling station 41 awmin chung

zinga polling station 3 Silsuri 1, 2, 3 te chu critical polling station niin Zopui polling station chu ke a kal ngai a ni bawk.

Dampa bial ah hian hmeichhia vote nei mi 10185 leh mipa vote nei mi 10605 avaiin vote nei mi 20790 an awm a ni.



BY ELECTION CAMPAIGN

Naktuk Pathianni tlai dar 4-ah Dampa bial by election atana campaign hun a tawp tawh dawn avangin, vawiin khan political party te chuan vote zawn hun hnuhnung hmang tangkaiin, thuthar thehdarhtute kaltlangin an party dinhmun an sawi.

Dampa bial by-election neih tur chungchangah hian vawiin khan party pathum ten Aizawl Press Club ah Press Conference an nei a, ZPM President Pu Lalliansawta chuan Dampa bial mipuite chu an candidate Pu Vanlalsailova vote tura sawmin ZPM sawrkar kum chhungin theihtawp an chhuah a ti a, an sawrkar chhungin hmasawmna hnathawh tih hlawhtlin hrang hrang an nei tih sawiin, Pu Lalliansawta chuan ZPM sorkar kum hnih a hman mek chhunga a lawmna ber chu eirukna lakah Minister leh MLA zingah hminghliau pakhat mah an la awm lo a, an tum ang ngeiin eiruk awm lohna, langtlang sawrkar an siam mek a ti a, tha taka an chhunzawm zel theih nan mipui thlawpna an mamawh thu a sawi.

(ZPM President Byte)

MNF Treasurer Pu Lalruatkima pawhin vawiin khan chanchinbumite a kawmna ah an party candidate Dr R. Lalthangliana chu opposition MLA tha tak leh sawrkar finchhuahtu tha tak ani dawn a ti a, ZPM sawrkar buai tak, ram kaihhruaina kawnga kal ngaihna hre lo tak chuan thurawn petu leh khalh ngiltu tha an mamawh tih sawiin ZPM sawrkar chuan ram leh hnam himna a ngaihsak lo hle a ti a, MNF chu an campaign kawngah pawh dan chhungah mawi takin an che tih sawiin Dampa bial by election ah an party candidate Dr R Lalthangliana vote theuh turin Dampa bial mipuite a sawm a ni.

(MNF Treasurer Pu Lalruatkima Byte)

MPCC Treasurer Dr Lalmalsawma Nghaka pawhin vawiin khan thuthar thehdarhtute kawmin Dampa bialah an la hriat ngailoh sum lengvak a nasa hle a ti a, Dampa bial mipuite inveng him turin an sawm tih sawiin ZPM sawrkar chuan Sawrkar laipui BJP kaihhruai sawrkar a hlauh avangin FCAA chungchangah a hnungtawlh a ti a, MNF pawhin NEDA an thawhpui thu sawiin Congress chiah BJP sawrkar do ngam an nih thu a sawi. Dr Lalmalsawma chuan mipuite dikna chanvo tundin a nih zel theih nan Pu John Rotluangliana vote theuh turin Dampa bial mipuite a sawm a ni.

(MPCC Treasurer Dr Lalmalsawma Byte)

BJP pawhin campaign chhunzawm zelin vawiin khan Palak Bialtu MLA Pu K. Hrahmo chuan West Phaileng Dinthar kawm-a Street Campaign buatsaihah thusawiin Pu Hrahmo chuan Dampa bial mipui te chu Kum 3 atana BJP enchhin turin a ngen a, kum 3 chauh a awm tawh avangin hemi chhung tal hi chu BJP MLA lo Vote sak theuh turin a sawm a. ZPM chuan MLA an mamawh belh lova, MNF leh

Congress Party te chu State ah leh Central lamah Opposition Party an nih bawh avangin, Central Sorkar a kan bial mamawh te sawi chhuak tur chuan BJP MLA an neih ngei a pawimawh hle a ti a. Chuvangin Party sawi lova, BJP a inpek kher pawh ngai lovin, he bial hmasawnna atana BJP Official Candidate Pu Lalhmingthanga lo Vote theuh turin a ngen a ni.

Dampa bialah hian naktuk Pathianni tlai dar 4 thleng Political party te campaign phal a ni a, Election Commission of India in inkaihhruaina a siam angin inthlan hma darkar 48-a zawm tur dan hrang hrang a siam a, November ni 9 tlai dar 4 atanga November ni 11 tlai dar 4 inkarah Dampa Constituency pawn atanga campaign tura kal, Dampa Constituency-a vote nei ve si lo ten constituency an chhuahsan tawh tur ani tih a ni a, au rinna hman phal anih tawhlo bakah campaign phal a ni tawhlo a, ECI thuchhuah tarlan danin Social meida leh a tlukpui dangah mipui rilru sukthlek tidanglamn thei thil dah chhuah phal a nilo tih sawiin Dan zawmlo te chu kum hnih thleng lungin tan emaw, pawisa chawi emaw, pawu chawi leh lungin tang tura hrem theih an ni dawn an ti bawh.

ECI tarlan danin Candidate emaw Party tin te'n chi leh chi, sakhuana, hnam leh hnam, etc. inkar boruak tichhe thei lam hawiin engmah tih loh tur a ni an ti a, Vote hmuh theihna turin chi leh chi inkar boruak ti chhuak zawngin engmah tih loh tur a ni an ti bawh.

<><><>

MZP

Red Bull Aizawl Tlang Ruam 2025 (Urban Downhill Racing) Aizawla buatsaih ah Mizo hnam lam -Cheraw kaihlek chu an pawm zawng anih loh thu Mizo Zirlai Pawl bakah Art & Culture Department, Mizo Cultural Organisation (MCO) leh Mizo Culture Artists' te chuan an sawi a,

MZP chuan thu zawtfiahin, RED BULL aiawha rawn kal te hian Mizo hnam lam (Cheraw) mawi lo taka kaihlek a ni chu pawu an tih thu an sawi a, he thila a mawhphurtu ber chu Contract an ziahpui zing a mi Content Creator pakhat Yashwi Arora, Producer Red Bull India, a nih thu an sawi. Yashwi Arora hian tukin zing dar 7:00 bawr vel khan Mizoram chu Flight hmanga alo chhuahsan tawh thu an sawi bawh.

MZP chuan Mizo hnam lam ti bawhrhbang zawnga hma la tu Yashwi Arora hian Mizo mipuite hmaah ngaihdam a dil ngei an phut tlat a, ngaihdam a dil lo a nih chuan a tawp thlenga umzui an tum thu an sawi a. RED BULL team te chuan MZP duh dan anga Mizo mipuite hmaa ngaihdam a dil ngei theih na turin Yashwi Arora hi an lo biak tur thu leh mawh an lo phurh tur thu an sawi bawh.

Hetih lai hian Art & Culture Department chuan thuchhuah siamin cheraw kan lai dik lo tak maia Aizawl veng pakhata entir a ni chu pawu an tih thu an sawi a. Hnam lam hi a tibawhrhbang zawng leh a zahawmna tihmelhem zawnga entir an phal lo tih mipuite an chah nawn a ni.

Mizo Cultural Organisation (MCO) leh Mizo Culture Artists' pawhin thuchhuah siamin tute emaw programme buatsaiha Mizo hnam lam mawi lo taka entir a ni leh a video a darh vak mai chu an ngaimawhin an duh lo hle tih an sawi a. Mizo hnam lam chi hrang hrangte chu hnam rohlu a ni a, chawi nuna tihlar zel an duh a, a hmasawn zawng ni lova hetiang a uchuak taka lantir a ni chu an dem tih

sawiin hetiang zawng hian tumah che tawh lo se hma lak theihna chinah chuan na takin hma an la dawn tih an sawi bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

CYMA

Central YMA President Pu R Lalngheta kaihhruaiin Central YMA hruaitu ten Mizoram châk lakluhna kawngpui Sairang leh Vairengte kawngpui chu vawiin khan an enfiah a,

Kawngpui endikna ah hian NHIDCL leh Contractor te hian hna an thawh mek leh an work plan te sawiin, hmanraw lakluh leh thil danga harsatna an tawh te an lo hrilh a, Central YMA hruaitute chuan harsatna an neih te pawh inhthlahrung lova an hnena thlen zel turin an hrilh a, kawng siam mekah tha taka an thawhpui tur thu an hrilh bawk. Central YMA hruaitute hian Sairang leh Kawnpui inkar kawng chhia siamtha tur Contractor te chu an hnathawh hun chhunga tha tak leh lungawithlak taka thawh zo hman ngei turin an chah a. An hnathawh dan hi an enzui zel tur thu leh Monitoring atan thil sawiho zung zung awlsamnan leh hnathawh dan tarlanna turin NHIDCL, Contractor te leh Central YMA hruaituten ruahmanna siam an a ni.

Central YMA hian kawng chungchanga an hmuh dan hi Executive meeting ah an sawi zui dawn a, Mizoram sawrkara thlen tur leh NHIDCL leh Contractor te la sawi pui zui tur te an sawiho leh dawn a ni.

Pu R. Lalngheta leh Central YMA OB 4 leh CEC Member 37 an thawk chhuak a. PWD atangin SE, EE leh SDO te an tel bakah NHIDCL hotute leh an hnuaia Contractor te an tel a. Central YMA Team te hi Awithangpa Group YMA hruaitute leh Sub-Hqrs. YMA Kolasib hruaituten lo dawngsawng in Sub-Hqrs. YMA Office ah leh Kolasib a NHIDCL Office ah kawng chungchang sawihoin Youth for Kolasib (YFK) te hmalak tawhna ngaihthlak a ni bawk.

Central YMA hruaitute hian kawng dinhmun enfiah hian Vairengte an thleng a, Vairengte Joint YMA Committee Room ah sawihona hun an hmang zui bawk. Vairengte- Sairang Four Lane laih tan mekah Contractor te pawh sawipuiin a nih dan tur anga hnathawk turin an chah a, an la en zui tur thu an sawi bawk a ni.

Central YMA President Pu R. Lalngheta chuan Mizoram kawngpui thatna atan hian Sawrkar leh pawl hrang hrang ten hma an la a. Amaherawhchu chak lakna ber kawngpui chu a tha mawh hle a ti a, an hmalakna te en tlang a, tha taka hrilh an nih hnuah pawh a ngai reng a la ni a nih chuan - Mizorama hnathawk tur hian midang lo lut rawh se, anni chuan lo hawsan tawh rawh se tih hun te pawh a awm lovang tih a sawi theih loh a ti.



PM IN VARANASI

Prime Minister Narendra Modia chuan vawiin khan Varanasi atangin Vande Bharat Express train thar pali a vailiam. Thusawiin Prime Minister Modia chuan Vande Bharat te, Namo Bharat leh Amrit Bharat te chuan Indian Railway chhuanthar lo awm zel tur tan bulthut rintlak a din a ti a. Vawiina Bande Bharat train pali hawn takte nen ramchhungah Vande Bharat train hi avaiin 160 chuan a awm tawh a ni a ti bawk. Vande Bharat Train thar pali te hi Varanasi-Khajuraho, Lucknow-Sarai Rohilla, Firozpur-Delhi, leh Ernakulam-Bengaluru tlan turte an ni.

